



Minggu, 18 Pebruari 2024
Ogen: Kolose 4:5-6



Ngena Ate Kalak Cakapndu



Siksik lebe maka tindes, ukuri lebe maka belasken nina kuan-kuan kalak kalak karo. Enda sada pengajaren si mehuli man banta gelah pentar encibalken ranan man ise pe isekelewetta. Ranan e banci mereken semangat man si megisa, banci ka nambah rawana adi la tengteng pembelasken.

Man kalak Kristen Kolose pe ipersinget Paulus gelah pentar encibalken ranan, kususna man kalak si lenga Kristen. Jaga gelah ula arah cakap kalak Kristen e, tempa ganjangan ia asangkan si labo kalak Kristen, entah lit kesan nalahken kalak ras menghakimi. Cakapta sopan min, mehamat ras teraloken kalak si enterem. Cakapta sederhana la erbahan kalak megelut, ise pe banci jadi temannta sabap labo sitokohi kalak arah cakapta. Arah cakap entah ranan kalak Kristen e enterem min kalak nggejapkan kiniulin Kristus e ras tek.

Tapi tetap ipersingeti Paulus, maka labo terjeng cakap, ndauh ulin si mehuli e teridah arah perbahanen ras sikap geluh si teptep wari. Teremen kalak nggit erlajar jadi kalak Kristen erkiteken ngidah lagulangkah kalak Kristen asangkan terjeng megiken kata-katana saja si la ikut ras perbahanenna. Kata-kata si mehuli sembaba min ras perbahanen si mehuli.

Cakap si ibelasken kita situhuna rehna i bas pusuhtha nari. Adi bersihlah isi pusuh, ugapa pe mehuli cakap si ibelasken, tapi adi isi pusuh kin pe la jore, cakapta kin pe banci ndempar. Arah cakap si ibelasken kita situhuna teridah uga isi pusuhtha. Sada pengajuk man banta gelah min, cakap si ibelasken kita mabai kalak reh rembakna man Kristus. La banci lang, pusuhtha lalap idemi keleng ate Kristus. *Perkataan anda adalah cermin dari kepribadian karena itu hiasilah dengan tutur yang indah agar menentramkan. Padukan dengan prilaku yang baik dan juga sopan (Merry Riana).*